

O‘zbekiston Respublikasi Hukumati bilan Gruziya Hukumati o‘rtasida sanoat
mulkini muhofaza qilish sohasidagi hamkorlik to‘g‘risida
B I T I M

O‘zbekiston Respublikasi Hukumati va Gruziya Hukumati, bundan keyin Tomonlar deb ataladilar:

ikkala davlat o‘rtasidagi tarixan tarkib topgan do‘stona munosabatlarni e’tiborga olib,
savdo-iqtisodiy va ilmiy-texnikaviy hamkorlikni rivojlantirish istagida,
sanoat mulkini samarali va monand muhofaza qilish bunday hamkorlikni rivojlantirishning
zaruriy sharti ekanligini e’tirof etib,
sanoat mulki mualliflari va egalarining huquqlarini muhofaza qilish uchun o‘zaro qulay
shart-sharoit yaratish zarurligini anglagan olda,
quyidagilar haqida kelishib oldilar:

1-modda

Tomonlar ixtiolar, sanoat namunalarini, mahsulot belgilari va boshqa sanoat mulki obyektlariga bo‘lgan huquqlarni muhofaza qilish hamda ulardan foydalanish sohasidagi hamkorlikni ushbu Bitimga va boshqa o‘zlari ishtirokchi bo‘lgan yoki bo‘ladigan xalqaro shartnomalarga muvofiq o‘zaro manfaatdorlik hamda tenglik asosida amalga oshiradilar va rivojlantiradilar.

2-modda

Tomonlarning hamkorligi:
sanoat mulki obyektlariga bo‘lgan huquqlarni muhofaza qilish va ulardan foydalanish bilan bog‘lik masalalarni tartibga solishga;
sanoat mulkini muhofaza qilish sohasidagi milliy huquqiy hujjatlarni muvofiqlashtirishga;
O‘zbekiston Respublikasi talabnomasi beruvchilari uchun Gruziyada va Gruziya talabnomasi beruvchilari uchun O‘zbekiston Respublikasida muhofaza hujjatlari berish so‘ralgan talabnomalarni topshirish va ularni ko‘rib chiqish tartibini o‘zaro soddalashtirishga;
sanoat mulkini muhofaza qilish sohasida axborot, normativ va boshqa hujjatlar, shuningdek tajriba va mutaxassislar almashishga yunaltiriladi.

3-modda

Sanoat mulkini muhofaza kilish sohasida bir davlatning jismoniy va yuridik shaxslari ikkinchi davlat xududida shu ikkinchi davlatning huquqiy hujjatlari bilan uning o‘z jismoniy va yuridik shaxslari uchun xozirgi vaktda berilgan yoki keyinchalik beriladigan huquq va imtiyozlardan, shuningdek o‘z jismoniy va yuridik shaxslari bilan bir xil asoslar hamda hajmlarda huquqkiy muhofaza vositalaridan foydalanadilar.

Bunda ushbu Bitim bilan tartibga solinmagan masalalar bo‘yicha Tomonlar 1967 yil 14 iyulda Stokgolmda qayta ko‘rib chiqilgan Sanoat mulkini muhofaza qilish to‘g‘risidagi Parij Konvensiyasi qoidalarini qo‘llaydilar.

4-modda

Tomonlarning har bir sanoat mulki obyektlari uchun ilgari berilgan muhofaza hujjatlarining amal qilishi har bir davlat xududida muhofaza qilinayotgan obyektning ushbu obyekt uchun talabnomasi berilgan vaqtida amal qilayotgan qonun hujjatlarida nazarda tutilgan muhofazaga layokatlilik shartlariga nomuvofiqligi vajidan to‘xtatilishi mumkin bo‘lgan

qoidalarni davlatlardan har birining tegishli huquqiy hujjatlariga kiritish maqsadida zarur choralarni ko‘radi.

5-modda

O‘zbekiston Respublikasi yoki Gruziyaning har qanday jismoniy yoki yuridik shaxsi litsenziya shartnomasi tuzmasdan ixtiro yoki sanoat namunasidan foydalanish huquqini, basharti ushbu ixtiro yoki sanoat namunasidan foydalanish boshqa shaxslar tomonidan avval SSSR mualliflik guvoxnomasi yoki SSSR guvoxnomasi berish uchun talabnama ilgari berilgan ixtiro yoki sanoat namunasiga milliy patent berish so‘ralgan iltimosnomasi topshirilgan sanadan oldin qonuniy ravishda boshlangan bo‘lsa, saqlab qoladi.

Bunda mukofot pulini to‘lash ko‘rsatilgan ixtiro yoki sanoat namunasi qaysi davlat xududida foydalani layotgan bo‘lsa o‘sha davlatning huquqiy hujjatlarida belgilangan tartibda amalga oshiriladi.

6-modda

Tomonlar Tomonlarning vakolatli organlari buyurtmasiga ko‘ra olinadigan materiallar, talabnomalarning mahfiyligini ta’minlaydilar, patentlar berish so‘ralgan talabnomalar bo‘yicha texnika darajasini aniqlash uchun axborot qidiruvini o‘tkazadilar yoxud ekspertiza o‘tkazadilar va ushbu talabnomalar bo‘yicha patentlar berish mumkinligi haqida xulosalar tayyorlaydilar.

Ko‘rsatib o‘tilgan ishlar Tomonlarning tegishli harajatlarini mablag‘ bilan ta’minlagan holda shartnoma asosida amalga oshiriladi.

7-modda

Tomonlar iktisodiy, sanoat, fan va texnika sohasidagi hamkorlik to‘g‘risidagi ikki tomonlama bitimlarga sanoat mulki obyektlarining muhofaza qilinishini ta’minlashga doir qoidalarni kiritish majburiyatini zimmalariga oladilar.

8-modda

Muhofaza hujjatlarini berish so‘ralgan talabnomalarni topshirish, muhofaza hujjatlarini qabul qilib olish va ularni o‘z kuchida saqlab turishda ikkala davlatning patent vakillari o‘zaro hamjixatlilik prinsipi asosida bevosita shu davlatlarning patent idoralari bilan ish olib borishlari mumkin bo‘lib, bunda faqat milliy talabnama beruvchilarining manfaatlarini ifodalaydilar. Bir davlatning milliy talabnama beruvchilariga, shuningdek uning huquqiy hujjatlari bilan belgilangan tartibda o‘zaro hamjixatlilik prinsipi asosida muhofaza hujjatlarini olish va ularni o‘z kuchida saqlab turish borasida bevosita boshqa davlatning patent idorasi bilan ish olib borish huquqi beriladi.

9-modda

Talabnomalar topshirganlik, muhofaza hujjatlari bergenlik, ularni o‘z kuchida saqlab turganlik va sanoat mulkini muhofaza qilish bilan bog‘liq boshqa yuridik jihatdan ahamiyatli ishlarni bajarganlik uchun bojlarni to‘lash, shuningdek qidiruv o‘tkazganlik va boshqa xizmatlar ko‘rsatganlik uchun to‘lovlar qilish milliy talabnama beruvchilar bojlarni to‘lashi va to‘lovlar qilishi uchun O‘zbekiston Respublikasi va Gruziyaning huquqiy hujjatlarida nazarda tutilgan valutada hamda mikdorlarda O‘zbekiston Respublikasi va Gruziyaning vakolatli organlari tomonidan kelishilgan kurs bo‘yicha amalga oshiriladi.

10-modda

Tomonlarning ushbu Bitimni amalga oshirish davomida bir-birlariga yo‘llaydigan barcha hujjatlari rus tilida takdim etiladi.

11-modda

Quyidagi patent idoralari ushbu Bitimni amalga oshirish uchun vakolatli organlar hisoblanadi:

O‘zbekiston Respublikasida - O‘zbekiston Respublikasining Davlat patent idorasi;
Gruziyada - Gruziya "Sakpatenti" patent idorasi.

Patent idoralarining hamkorlik qilish tartibi va shartlari ular o‘rtasidagi maxsus bitimlar bilan aniklanadi.

12-modda

Ushbu Bitimdan kelib chiqadigan yoki uning bajarilishi bilan bog‘lik. masalalar yuzasidan kelishmovchiliklar paydo bo‘lgan taqdirda Tomonlarning vakillari tegishlicha maslahatlashuvlar o‘tkazadilar va bunday kelishmovchiliklarni bartaraf etishga erishish uchun kuch-g‘ayrat sarflaydilar.

13-modda

Ushbu Bitim Tomonlarning boshka davlatlar bilan sanoat mulkini muhofaza qilish sohasida ikki tomonlama va ko‘p tomonlama hamkorlikda ishtirok etishiga to‘sqinlik qilmaydi.

14-modda

Ushbu Bitim imzolangan kunidan boshlab. kuchga kiradi va besh yil mobaynida amal qiladi hamda, basharti Tomonlardan biri uning navbatdagi amal qilish davri tugashiga kamida olti oy qolganda Bitimning amal qilishini to‘xtatish niyati to‘g‘risida ikkinchi Tomonni yozma ravishda xabardor qilmasa, yana keyingi besh yillik davrlarga o‘z-o‘zidan uzaytirilaveradi.

Ushbu Bitim amalda bo‘lishining to‘xtatilishi ikkala davlat jismoniy va yuridik shaxslariga ushbu Bitimning amalda bo‘lishi to‘xtatilgungacha berilgan yoki berilishi mumkin bo‘lgan muhofaza hujjatlarining amal qilishiga ta’sir etmaydi.

1996 yil "28" may da Tbilisi shahrida ikki asl nusxada, har biri o‘zbek, gruzin va rus tillarida tuzildi, barcha matnlar bir xil kuchga ega.

Ushbu Bitim qoidalarini talqin qilishda rus tilidagi matndan foydalaniladi.

**O‘zbekiston Respublikasi
Hukumati tomonidan**

**Gruziya Hukumati
tomonidan**